

2 - Vrouwvolk

Pier staot achter de bar, Douwe zit op de krukke d'r veur, mit een foto in de haand.

Sietse komt weer binnen broezen.



hebben jim et al heard?

- S: Hebben jim et al heard?! Mien zuster Sijtje wil bi'j mi'j vot. We hebben krek ommeraek ruzie had!
- P: Hoho, Sietse, doe es even kaalmpies an. Gao d'r es rustig bi'j zitten, kriej'een borrel van me... en vertel es.
- S: Ja, jow hebben makkelijk praoten, Pier. Mar Sijtje wil bi'j mi'j vot. Bin ik dommiet hielemaol alliend thuus.
- D: Now, Sietse, of jow dàor zo rouwig om wezen moeten....
- S: Ja wis en zeker wel. Hoe moet ik mi'j alliend redden dan?
- P: Mar jim hadden ruzie had, zeden jow. Waor hadden jim spul over dan?
- S: Och, in wezen gong et naargens over. Ik maekte mar een grappien, mar dat vul hielemaol verkeerd.
- D: Tja, dat wil bi'j vrouwluden wel vaeker gebeuren, Sietse. Ha'k jow van teveuren wel zeggen kund.
- P: Mar wil Sijtje now bi'j jow vot, alliend omreden jow een grappien maekten? Dat liekt mi'j staark.
- S: Now nee...en ja, toch ok weer wel. Et lopt allemaole wat deur mekeer.
- D: Now, begin dan es bi'j et begin. Dan stap veur stap veerder en an et aende zullen Pier en ik jow wel van goeie raad veurzien.
- S: Now, daor he'k wat an. Goeie raad van zoe'n snuiter as jow, die zels van toeten nog blaazen weet.
- D: Hoe bedoel ie dat, Sietse mannegien? Ik bin eerst erveringsdeskundige heur. Ik bin per slot van zaeken al jaoren trouwd. Now, dàn hej' de gebruiksanziezing wel in de bovenkaemer zitten heur.
- S: Jaja, in de bovenkaemer zit bi'j jow al van alles....Et perbleem zat meer an de onderkaante now?
- D: Waor doelen jow op, Sietse?
- S: Now, dat verhael van die Amerikaanse dokter...try the other hole....
- D: Och, och, wat flauw... ie moe'n gien oolde koenen uut de sloot haelen.
- P: Krek, over oolde koenen spreuken. Hoe zit dat now met Sijtje?
- S: Now, et begon een dag of wat leden. Sijtje hadde een kontaktadvertensie lezen in de kraante en was op et idee kommen, dat ze misschien toch mar es an de man moest. Die kon dan mooi bi'j oons inwonen en zo...
- P: En daor zaten jow niet op te waachten
- S: Nee vanzels niet.

Ondertussen haelt Douwe de foto weer uut de binnenbuse en kiekt d'r even naor.

- D: Doe d'r eerst nog even iene in, Pier. Dan holen we de lippen nat bi'j et verhael van Sietse.
- S: Stel jow veur.... ik kon wel jaanken. Mar Sijtje miende et allemaol nog echt ok. Ze hadde et over een date...een ofspraakien mit die vent. Ik zegge nog: jow kennen die kerel ommes hielemaol niet. Nee, zegt ze, daaromme moe'n we op een date.

Mar dan gao ik eerst even naor de kapper en laot de naegels even doen.
En ik moet zien da'k mien borsten wat vergroot. Daor valen mannen op.

P: De borsten vergroot?

D: Haha, now die loopt wel wat hadde van staepel niet?

S: Dat kuj' wel zeggen ja. Dat ik zegge: now et mag wat kosten zeker? De kapper, zoe'n naegel-viel-taante en een borstoperaosie? Ik docht et toch niet!

D: En dat vul verkeerd.

S: Ja, dat vul zeker verkeerd. Ie gunnen mi'j ok niks, raosde Sijtje. Dat ik raosde weeromme: oh, best wel heur. Gao mar rap naor de kapper en laot die naegels mar doen....mar die borstvergroting kuj' zels wel regelen.

P: Haha, dat liekt me nog niet zo ienvooldig.

S: Nee, dat raosde Sijtje ok. Dat ik zegge: ik hebbe daor lestdaegs nog een stok over lezen, in de waachtkamer bi'j de dokter. Doe ik daor was veur die nierstienen. Jow kun zels jow borsten vergroten deur d'r daegelijks even mit een pepiertien tussen te wrieven.

D: Haha, die Sietse. Now, daor geloofde ze vanzels niet zo vule van.

S: Krek. Wat een oonzin, raosde Sijtje. Ie moe'n mi'j niet zo de gek anstikken. Nee, mar ik mien et echt heur, zee ik. Oh ja, zee Sijtje, en waaromme zol dat waarken...? Alle daegen mit een pepierten tussen de borsten wrieven om ze groter te kriegen ... Now, zee ik, da's mit jow kont toch òk lokt?

P: Oei, doe haj' de poppen an et daansen daenk'?

S: Now en of. Dat dri'jde uut op slaonde ruzie.

Ondertussen het Douwe de foto weer uut de binnenbuse haelt en kiekt d'r even naor.

D: Doe d'r nog mar gauw iene in, Pier (*stikt de foto weer in de binnenbuse*)
En hoe is dat oflopen mit die ruzie?

S: Doe de ruzie veurbi'j was kwam ze op hanen en voeten bi'j mi'j.

P: Eerlik? Dat ha'k niet docht, Sietse. Dat moe'k jow naogeven.

D: Da's inderdaad verrassend, Sietse. Op hanen en voeten zeden jow.
En wat zee ze doe tegen je?

S: Kom onder dat bedde vot, smerige schietluus daj' d'r bin!
Now en doe he'k et op een lopen zet hier naor toe.

P: Och, och, och, Sietse. Dat moej' dommiet wel weer goed maken heur. Aj' niet uitkieken, loopt ze nog echt vot.

D: Vaalt wel mit, daenk. Jim wonen al zolange tegere in et huus van jim oolders.

S: Zoj' daenzen, Douwe? Ik zitte d'r al over in. Hebben jow nooit et zok soorte ruzies mit jow vrouw?

D: Zelden, Sietse. Een verstaandige man weet wanneer ie wat moet zeggen en wanneer et beter is de mond te hopen.

P: Ja, veural dat leste, haha?

S: En jow dan Pier. Jow bin toch ok trouwd?

P: Ik hebbe een vrundin, mar da's haost etzelde.

D: Die hewwe hier eers nog nooit zien, Pier. Hoe komt dat zo?

P: Nee, dat gaot niet gebeuren ok! Veul te risikovol. Dommiet bin ik heur kwiet.

S: Zo knap?

P: Zeker en wis! Mien vrundin, om in autotermen te praoten, da's krek een Jaguar: zo mooi en stroomli'jnd.....

- D: Zo! Now die van mi'j is meer een Volkswaegen: zunig en betrouwber. En da's ok wat weerd! En Sijtje, tja Sijtje...Wat vienen jow Sietse?
S: Sijtje is meer een braandweerauto: doe-dit-doe-dat-doe-dit-doe-dat!
P: Now, zuwwe d'r daar nog mar iene op nemen dan? Of hebben jim al genog?

Douwe haelt de foto weer teveurschien, kiekt even en dot 'm weer in de binnenbuse

- D: Now, ientien kan nog wel zie'k.
P: Wat is dat veur foto, waar as jow hieltied naor koekeloeren?
D: Foto van mien vrouw.
S: Och heden, die ziej' toch alle daegen? Moet d'r dan ok nog een foto mit?
D: Ja, da's mien graodmeter.
P: Graodmeter? Waorveur?
D: Of ik nog een borrel mag.
S: Hoe waarkt dat dan?
D: Zo gauw ze op een fotomedel lieken gaot, wete ik da'k genoeg had hebbe.
P: Haha, da's een goeie.
S: Tja...et is wat.....vrouwluden.....
D: Now...et is wat.....
P: Krek....jim haelen mi'j de woorden uut de mond.
En et wodt alliend mar slimmer.....
S: Zoj' daenken, Pier? Hoe holen wi'j manluden oons staonde dan?
D: Gelokkig hebben wi'j nog et kefee. D'r even uut...zonder vrouwvolk...
P: Juust. Et kefee... de mannen-enclave...et bastion veur kerels....
S: Da's waar. Alhoewel... D'r het hier om 'e hoeke een peer jaor leden nog een schoffien een vrouwenkefee zeten. Weten jim nog wel?
D: Klopt, mar dat het niet lange duurt....gelokkig
P: Nee, dat leup al rap op 'e klippen....
S: Waoromme eins?
P: Oh, da's wel een mooie: et vrouwenkefee is sleuten bi'j gebrek an mankracht.
D: Haha, ziej' wel! Mannen-enclave!
S: Bastion veur kerels.
P: Ja, mar ik hebbe achter nog wel een fust vrouwenbier staon.
S: Ach hool op jow. Vrouwenbier....dat bestaot niet.
P: Wis wel.
D: En wat is daar aandere dan an oons pottien bier?
P: Now ja, et schient typische bi'jwaarkings te hebben.
S: Zo as?
P: Now, daj' vaeke naor de wc moeten...en dan niet alliend, mar mit mekeer.....
D: Daj' mar blieden praoten en praoten... zonder wat zinnigs te zeggen...
S: Oh ja...en dat et autorieden niet meer lokt....laot staon et inparkeren....Haha.
D: Dat zol wat wezen...vrouwenbier....Hoe zol dat dan hieten?
S: Madamstel? Zijneken?
D: Hertogin Jeanet?
P: Ik daenke.....Krols!
Nemen we d'r nog iene op de goeie ofloop?

Douwe pakt de foto d'r weer bi'j...kiekt es goed...

D: Nee, lao'k et mar niet doen. Ik docht even da'k Doutzen op de foto zag.
Ik moet mar es op huus an.

*Komt overaende. Trekt zien kleren recht en striekt deur et haar (krek as een vrouw).
Loopt heupwiegend naor de deure.*

D: Laeterrrrrr! Gaot vot

S: Ja, ik gao ok mar es. Es zien of de storm liggen gaon is.
Butendat moe'k nog naor een lezing over alkoholgebruuk.

P: Een lezing zegt ie. Wie geft die lezing dan en waor is dat?

S: Wat daenk' ie? Sijtje vanzels....thuus.

Gaot of

P: Now daor stao ik in mien uppien. Altied etzelde mit die kerels. Een bult bombarie,
overall an zitten en an et aende laoten ze jow mit de ofwas zitten.